

# RUTE

## (Rúchi)

**Erimeré rü Moábianewa naxü  
ngímaxã ga naxmax ga Noemí rü  
nanegü**

**1** <sup>1-2</sup>Rü yexguma  
Iraéuanecüãxgümaxã inacuaxgügu  
ga yema ãëxgacügü ga guxchaxügiarü  
mexëëruügiü ga Tupana nüxü unetaxü,  
rü ínangu ga taxü ga taiya ga guxüma ga  
yema naanewa. Rü yexgumaücüxü rü  
Yudáanewa nayexma ga wüxi ga yatü ga  
Erimerégu ãégacü ga Beréüarü ñanegu  
ãchiücü. Rü nüma ga Erimeré rü naxmax  
ga Noemímaxã rü nanegü ga Maróü rü  
Querióümaxã Beréüwa inaxiãchi nax  
Moábianewa naxixüçax. Rü nümagü rü  
Efrátacüãx nixigü yerü Efráta nixí ga to  
ga naéga ga Beréü. Rü Moábianewa  
nangugü rü yexma nayaxãchiügiü.  
<sup>3</sup>Notürü nüma ga Erimeré ga Noemí  
ngíte rü yexma Moábianegu nayayu. Rü  
ngíma ga namax ga Noemí rü  
ngíxicatama yéma iyaxü namaxã ga  
taxre ga ngíne. <sup>4-5</sup>Rü yixcüamaxürachigü  
rü nümagü ga yema taxre ga ngextüxücüü  
rü Moábianecüãx ga ngexügiümaxã  
nixãxmax. Rü wüxi rü Órfa nixí ga  
ngíéga, rü yema nai rü Rúchi nixí ga

ngíéga. Notürü yexguma 10 ga taunecü  
ngupetüxguwena, rü nayue ta ga Maróü  
rü Querióü. Rü ngíma ga Noemí rü  
ngíxica yéma itax, yerü marü nataxuma  
ga guma ngínegü rü ngíte.

### **Beréüwa ixí ga Noemí rü Rúchi**

<sup>6</sup>Rü wüxi ga ngunexügu ga Noemí ga  
yexguma Moábianewa nayexmayane, rü  
nüxü ixínü ga guma ngírü ñane ga  
Beréüwa rü marü nax nataxuxüma ga  
taiya, yerü Tupana rü namaxã  
nixãüãchi. <sup>7</sup>Rü yemacax nagu irüxínü  
ga Yudáarü naanecax nax natáeguxü.  
Rü ngíma rü ngíneaxgümaxã nawa  
íchoxü ga yema nachica ga nagu  
naxãchiüchiréxü ga Moábianewa nax  
ngíchiüane ga Yudáanewa naxüxüçax.  
<sup>8-9</sup>Notürü ga namawa rü ngíneaxgüxü  
ngígürügü: —¡Ëcü pewoegu rü  
peéxütawa pexí! ¡Rü Cori ya Tupana  
guxüguma mea pexü ngechaxü yema  
choxü rü chaunegüxü mea  
pengechaxüürüxü, rü pexü  
natauxchaxëëã nax wena mea  
pexãtegüxü, rü ngëmaäcü  
petaãxëgüxüçax! —ngígürügü. Rü  
nhuxmachi ga Noemí rü wüxi ga

chúxumaxã ngĩneaxgũxũ irümoxẽ.  
 Notürü ga ngĩma ga ngĩneaxgü rü  
 ixauxeama. <sup>10</sup>Rü ngĩgürügü: —Tama.  
 Rü toma rü tá cuchixũanewa cuwe  
 tarüxiama —ngĩgürügü. <sup>11</sup>Rü ngĩma  
 ga Noemí rü ngĩgürügüchigüãma:  
 —¡Pewoegu, Pa Chauxacügü!  
 ¿Taxaciüwa chi chawe perüxixü? Chama  
 rü marü tagutãma wena chaxãxaci nax  
 wena chaunemaxã pexãtexũcax.  
<sup>12-13</sup>¡Ëcü pechiücax pewoegu! Chama rü  
 marü chaya rü ngẽmacax taxütãma  
 wena chaxãte. Rü woo chi  
 nhamachitama i chütaxũgu chaxãtegu  
 rü chingixgu rü choxũ nangexmagu ya  
 chaunegü ¿rü pema rü chi  
 ípenanguxuxẽgũxũ nhüxmachita nayae  
 nax namaxã pingĩgũxũcax? Rü ngẽma  
 nax ípenanguxuxẽxũgagu rü taguchima  
 pexãtegu. Rü dücax, rü taxucürüwama  
 nixĩ, Pa Chauxacügü. Rü Cori ya  
 Tupana rü ngúxũ choxũ ningexẽxẽ,  
 notürü yexera chi changechaũ, rü ngúxũ  
 chinge ega chi pexũ chadaxgu nax  
 ngúxũ pingegũxũ i pemax —ngĩgürügü.  
<sup>14</sup>Rü ngĩma ga ngĩneaxgü rü wenaxarü  
 ixauxe. Rü düxwa ga Órfa rü ngĩxẽxũ  
 irümoxẽ wüxi ga chúxumaxã, rü  
 ngĩchiücax itãegu. Notürü ga Rúchi rü  
 ngĩxẽxũtagutama irüxãũx. <sup>15</sup>Rü  
 yexguma ga Noemí rü Rúchixũ  
 ngĩgürügü: —Dücax i ngẽma nai i  
 chaunex rü ngĩchiücax rü ngĩrü  
 tupanagücax itãegu. ¡Ëcü ngĩwe rüxü!  
 —ngĩgürügü. <sup>16</sup>Notürü ngĩma ga Rúchi  
 rü ngĩxũ ingãxũga rü ngĩgürügü:  
 —¡Tauxũ i choxũ cucaxũxũ nax cuxna  
 chixügachixũcax, rü cuxna  
 chatãeguxũcax! Erü ngextã ícuxũxüwa  
 rü ngẽma tá chaxü, rü ngexta

ícupexũwa rü ngẽxma tá chape. Curü  
 ãane rü chorü ãane tá nixĩ, rü yimã curü  
 Tupana, rü chorü Tupana tá nixĩ. <sup>17</sup>Rü  
 ngexta ícuyuxũgu rü ngẽxma tá chayü,  
 rü ngẽxma tá chatax. Rü Cori ya Tupana  
 choxũ poxcu ega tauta chayuyane cuxna  
 chixügachigu, erü yuxicatama nixĩ i  
 yigüna tüxü ixĩgachixẽxũ —ngĩgürügü.  
<sup>18</sup>Rü yexguma Noemí nüxũ cuaxgu ga  
 Rúchi rü aixcuma ngĩwe nax  
 naxüxchaũxũ, rü marü tama yemamaxã  
 ngĩxü ichixewe. <sup>19</sup>Rü yemaaciü ga yema  
 taxre rü ngĩgümaxã namagu ixĩ, rü  
 nhüxmata Berẽüwa nangugü. Rü  
 yexguma Berẽügu nachocuxgu, rü  
 guxũma ga yema duũxũgü rü  
 nabaxãchiãxẽgü. Rü yema ãanecüãx ga  
 ngexũgü rü ngĩgürügü: —¿Tama ãna  
 nhaa iyixĩ i Noemí? —ngĩgürügü.  
<sup>20</sup>Notürü ga ngĩma rü inangãxũ rü  
 ngĩgürügü: —¡Tauxũ i “Noemí”  
 nhaperügü choxũ! ¡Rü name nixĩ i  
 “Mára” nhapergürü choxũ! Erü Tupana  
 ya guxãétüwa ngẽxmacü rü taxũ i  
 guxchaxũ choxna naxã. (Rü ngẽma  
 naéga i Noemí rü Taãxeciü nhaxũchiga  
 nixĩ. Notürü ngẽma naéga i “Mára” rü  
 Taguma Taãxeciü nhaxũchiga nixĩ.)  
<sup>21</sup>Ããcumexẽãcüma nua íchaxũxü, rü  
 ngeãcumexẽãcüma chatãegu, erü  
 ngẽmaãcü nanaxwaxe ya Cori ya  
 Tupana. ¿Rü tüxücüü Noemímaxã choxũ  
 pexu, ega ngẽxguma Cori ya Tupana ya  
 guxũxüma cuáci choxũ poxcuxgu rü  
 ngechaxũ choxna axgu? —ngĩgürügü.  
<sup>22</sup>Rü yemaaciü nixĩ ga Noemí ga  
 Moábianewa natãeguxũ ngĩmaxã ga  
 ngĩneax ga Rúchi ga Moábianecüãx  
 ixĩcü. Rü chewádaarü buxuwa nangu ga  
 yexguma Berẽüwa nangugü.

### Rúchi rü Buáanewa iyexma

**2**<sup>1</sup>Rü Noemí rü ngíxúú nayexma ga wüxi ga ngítanüxúú ga ngíte ga Erimerétanüxúú ixícu ga Buágu áégacü. Rü gumá rü wüxi ga diéruáxüchicü nixí rü guxâma nüxü cuácü nixí. <sup>2</sup>Rü wüxi ga ngunexügu ga Rúchi rü Noemíxü ngígürügü: —Chebádachitaüwa tá chaxü, rü ngürüächí ngêxma tá nüxü chayangau i wüxi i buxetatanüxü i choxü nadexêxü i ngêma chewáda i nawe iyietanüxü —ngígürügü. Rü yexguma ga Noemí rü ngígürügü ngíxü: —Marü name Pa Chauzacüx. ¡Ëcü ngêma naxü rü naxü i ngêma nüxü quixuxü! —ngígürügü. <sup>3</sup>Rü yexguma ga Rúchi rü wüxi ga naanewa ixü rü yema buxetatanüxügüwe iyadeetanü ga chewádayaxa ga yéma iyietanüxü. Rü megu ingu yerü yema naane rü Buá ga Erimerétanüxüarü nixí. <sup>4</sup>Rü yexguma Rúchi yéma yexmayane rü nüma ga Buá rü ínangu ga Beréüwa nax ne naxüxü, rü yema naanewa ínayadau. Rü yema buxetatanüxügüxü narümoxê rü nhanagürü: —¡Cori ya Tupana pexütawa ngexmax! —nhanagürü. Rü nüma ga buxetatanüxügü rü nanangäxügü rü nhanagürügü: —¡Cori ya Tupana cuxü rüngüxêxê! —nhanagürügü. <sup>5</sup>Rü nhüxmachí ga Buá rü yema buxetatanüxügüeruna naca, rü nhanagürü: —¿Texétanüxü iyixí i ngéa pacü? —nhanagürü. <sup>6</sup>Rü nüma ga buxetatanüxügüeru rü nanangäxü rü nhanagürü: —Moábianecüáx iyixí, rü Noemímaxá Moábianewa ne ixü. <sup>7</sup>Rü choxna ica nax ngêma buxetatanüxügüwe chewádayaxa nax

yadeetanüxüçax. Rü paخمamacürüwa inaxügü nax napuracüxü, rü nhüxmatama nixí i paxaächí inangüxü —nhanagürü. <sup>8</sup>Rü yexguma ga nüma ga Buá rü Rúchixü nhanagürü: —Pa Chauzacüx ¡irüxínü, rü tama chanaxwaxe i to i naanewa cuyabuxeta! ¡Nuxátama rüxáüx natanügu i chauxütaxügü! <sup>9</sup>¡Rü nhüxüchi nawe rüxü i ngêma buxetatanüxügü ega ngêxguma nüxü cudaxgu i ngextá nax napuracüexü! Erü marü nüxna chaxäga i ngêma chorü duüxügü nax taxuxüma cuxü chixewexüçax. Rü ngêxguma quitaxawaxgu ¡rü ngêma dexápaüguwa naxü rü ngêma dexá i nüma nayauxgüxüwa naxaxe! —nhanagürü. <sup>10</sup>Rü ngíma ga Rúchi rü Buápexegu inangücuchi rü nüxna ica, rü ngígürügü: —¿Taxacü chawa cudad eçax chamaxá cumecümaxü i chama nax to i nachixüanecüáxmare nax chixíxü? —ngígürügü. <sup>11</sup>Rü nüma ga Buá rü ngíxü nangäxü, rü nhanagürü: —Chama rü meama nüxü chacuax ga nhuxäcü ngíxü nax cungechaüxü ga çuxê nawena ga cute ga cuxna yücü. Rü ngêxgumarüxü ta meama nüxü chacuax ga tüxna nax quixüxü ga cunatü rü cué, rü curü naane nax nuxá totanügu cuyaxächíüxüçax ga woo tama toxü cucuáxü ga cumax. <sup>12</sup>¡Rü Tupana cuxü naxütanü i ngêma! ¡Rü nüma ya Cori ya Iraéuanecüáxgüaru Tupana ga norü ngüxêçax cudadü cuxü naxütanü naxçax ga guxüma ga yema mexü ga cuxüxü! —nhanagürü. <sup>13</sup>Rü ngíma rü inangäxü rü ngígürügü: —Cuma rü poraächí chamaxá cumecümaxüchí, rü ngêma curü ore rü choxü nataãxêxêxê.

Erü cuma rü choxũ cungechaũãcũma chamaxã quidexa nax woo tama wũxi i cuxũtaxũ chixĩxũ —ngĩgürügü. <sup>14</sup>Rü yexguma chibüarü orawa nanguxgu, rü nüma ga Buá rü ngĩxcax naca ga Rúchi, rü nhanagürü ngĩxũ: —¡Nua naxü rü tomaxã nua nachibü! —nhanagürü. Rü ngĩma ga Rúchi rü yema buxetatanüxũgütanüwa irüto. Rü nüma ga Buá rü taxũma ga õna ngĩpexegu naxũ. Rü ngĩma rü meama ichibü nhüxmata ngĩxũ íyaxü. <sup>15</sup>Rü yexguma wenaxarü buxetawa naxĩxgu, rü nüma ga Buá rü norü duũxũgũna naxãga rü nhanagürü: —Marü name nax ngĩma rü ta chewádayaxa ta nadexũ. ¡Rü taxũ i ngĩxna peyanuxũxũ! <sup>16</sup>¡Rü woetama ngĩxcax ngẽma peyayixetanüxẽxẽ nax ngĩma rü yadeetanüãxũcax! ¡Rü taxũ i ngĩxna penachüxuxũ! —nhanagürü. <sup>17</sup>Rü ngĩma ga Rúchi rü Buáanewa chewádayaxa ta ide nhüxmata nachütamare. Rü norü yá ga yema chewáda rü 20 quíruarü yexera nixĩ ga yexguma marü nabuxãxgu. <sup>18</sup>Rü nhüxüchi guma íanecax itãegu rü íiyangexpüxũ ga yema chewáda rü ngĩxẽxũ iyawex. Rü yemawena rü inayaxu ga yema ngĩwemü ga íyaxũxũ rü ngĩxẽ ga Noemína inaxã. <sup>19</sup>Rü ngĩxẽ ga Noemí rü ngĩxna ica, rü ngĩgürügü: —¿Ngextá nixĩ icuyapuracũxũ i ngewax? ¿Rü ngextá nixĩ i muxũ i chewádayaxa ta cudexũ? ¡Rü poraãcü Tupana nüxũ rüngũxẽxẽ ya yimá duũ ya cuxũ rüngũxẽcẽcü! —ngĩgürügü. Rü ngĩma ga Rúchi rü ngĩxẽxũ ingãxũ rü nüxũ iyaxu ga Buáanewa nax yixĩxũ ga chewádayaxa ta nadexũ. <sup>20</sup>Rü ngĩma ga Noemí rü ngĩxũ ingãxũ rü ngĩgürügü:

—¡Tupana nüxũ rüngũxẽxẽ ya yimá duũ! Rü nüma ya Tupana rü tamaxã namecũma i nhüxmax rü guma cute ga marü yucũmaxã rü ta namecũma. Erü yimá yatü ya Buá rü wũxi i tatanüxũ nixĩ rü ngẽmacax nixĩ i nagu nanguxũ nax tüxũ nangũxẽxẽxũ rü tüxna nadauxũ —ngĩgürügü. <sup>21</sup>Rü ngĩma ga Rúchi rü nüxũ iyaxuchigũãma rü ngĩgürügü: —Rü chamaxã nüxũ nixu nax naxũtaxũgũmaxã chapuracũxũ nhüxmatáta nagú i buxetaarü puracü —ngĩgürügü. <sup>22</sup>Rü yexguma ga Noemí rü ngĩneaxũ ingãxũ rü ngĩgürügü: —Marü name, Pa Chauzacüx, nax naxũtaxũgũxũtawa curüxãxũ. Rü tama chanaxwaxe i togüanewamare cuxü nax taxuxũma cuxũ chixewexũcax —ngĩgürügü. <sup>23</sup>Rü yemacax ga ngĩma ga Rúchi rü nawe irüxü ga Buáxũtaxũgũ nax chewádayaxa ta nadexũ nhüxmata nagú ga nax yabuxgũãxũ ga chewáda rü trígu. Rü yemaacü ipuracü ga yexguma ngĩxẽ ga Noemíxũtawa nayexmayane.

### Buá rü Rúchimaxã namecũma

**3** <sup>1</sup>Rü wũxi ga ngunexũgu ga Noemí rü Rúchixũ ngĩgürügü: —Pa Chauzacüx, chama rü tá cuxũ naxcax chadau ya wũxi ya cute ya taãxẽ tá cuxna ãcü. <sup>2</sup>Rü dücax, rü yimá tatanüxũ ya Buá ya naxũtawa cupuracücü, rü nhama i chütaxũgu rü tá naanewa naxü nax ngẽma chewáda yabugütexexũcax. <sup>3</sup>Rü nhüxmax rü chanaxwaxe i cunaxü i ngẽma tá cumaxã nüxũ chixuxũ. ¡Rü naxaiya rü cugü napumáraxũne rü nagu icux i ngẽma cuxchiru i rümemaxũ, rü ngẽma naanewa naxü! ¡Notürü taxũtãma cugü nüxũ cucuãxẽxẽ nax texẽ

quixixũ naxũpa nax yanguxũ nax nachibũxũ rü naxaxexũ i nüma i Buá!  
 4;Rü mea nangugũ nax ngexta yixixũ i nacaxũ nax napexũcax! ;Rü ngẽma ínacaxũwa naxũ rü inangegücutü rü ngẽxma naca nacutüguama! Rü nümatátama nixĩ cumaxã nüxũ yaxuxũ nax taxacü tá cuxixũ —ngĩgürügü. 5Rü ngĩma ga Rúchi rü Noemixũ ingãxũ rü ngĩgürügü: —Marü tá chanaxü i guxũma i ngẽma chamaxã nüxũ quixuxũ —ngĩgürügü. 6Rü ngĩma ga Rúchi rü naanewa ixũ, rü inaxũ ga guxũma ga yema ngĩxẽ ngĩmaxã nüxũ ixuxũ. 7Rü yexguma marü chibũwa yanguxgu ga Buá, rü inachi rü nataãxẽ rü nhuxüchi yexma ãuxchitaxũ ga chewáxadũtagu nayaca nax yexma napexũcax. Rü yixcamaxũra rü ngĩma ga Rúchi rü bexma naxcax iyaxũ rü íinangegücutü rü yexma ica. 8Rü nüma ga Buá rü ngürüãchi ngãxũcuxü pewa nabajãchi. Rü yexguma nangüeguxgu rü ngĩmaxã nayarünha. Rü nüxũ nicuãxãchi ga wüxi ga nge nacutüwaama yexmaxũ. 9Rü ngĩxna naca rü nhanagürü: —¿Texé quixĩ i cumax? —nhanagürü. Rü ngĩma rü inangãxũ rü ngĩgürügü: —Chama nixĩ i Rúchi, rü cuma nixĩ i chautanüxũxüchi quixixũ. Rü ngẽmacax cugu nangu nax cuxmaxũ choxũ quixixẽxũ ngẽma Tupanaarü mugü nüxũ ixuxürüxũ —ngĩgürügü. 10Rü yexguma ga nüma ga Buá rü nhanagürü: —¡Cori ya Tupana cuxũ rüngũxẽxẽ! Rü nhuxmawaxi nixĩ i mea cunangoxẽxũ nax aixcuma nüxũ cungechaũxũ ga gumá cute ga marü yucü, erü choxũ cuyaxu cutexũ i chama i cutetanüxũ nax chixixũ. Rü tama naxcax cudau ya wüxi

ya cute ya choxũ rüngextüxümaecü ya diëruácü, rü woo tama diëruácü. 11;Rü tauxũ i cumuũxũ, Pa Chauaxcux! Erü guxũma i duũxũgü i daa chorü íanecüãx rü marü nüxũ nacuxãgü rü cuma rü wüxi i nge i mecü nax quixixũ. Rü ngẽmacax i chama rü tá chanaxü i ngẽma choxna naxcax cucaxũ. 12Notürü nangexma i wüxi i guxchaxũ. Rü aixcuma nixĩ i cutanüxũ chixixũ i chamax, notürü nangexma i to i chorü yexera cutanüxũxüchi ixixũ. 13;Ëcü nuxã rüxãxũ i nhama i chütaxũgu! Rü moxũ paxmama rü tá ngẽma to i cutanüxũmaxã chidexa rü ngoxi cumaxã naxãmaxchaũ. Rü ngẽxguma nanaxwaxegu nax cumaxã naxãmaxũ rü marü name nax ngẽmaãcü yixixũ, erü nüma rü chorü yexera cutanüxũxüchi nixĩ. Notürü ngẽxguma tama nanaxwaxegu, rü Tupanaégagu cumaxã nüxũ chixu nax chama tá cumaxã chaxãmaxũ. ;Ëcü nape rü nuxã ingunexũ! —nhanagürü. 14Rü ngĩma ga Rúchi rü yexma ipe, rü Buácutüguama ica rü yexma iyangunexũ. Rü moxüãcü taxütama yangóonexũchigu rü írüda yerü yema nhanagürü ngixũ ga Buá: “Tama chanaxwaxe nax texé nüxũ nacuáxũ i nua chauanewa nax cuxixũ i chewáda yabugütexegüxüwa”, nhanagürü. 15Rü yexguma marü inaxüãchichaxũxgu ga Rúchi, rü nüma ga Buá rü nhanagürü ngixũ: —¡Ëcü ínacuxuchi i ngẽma curü deyuchiru rü mea nüxũ ingĩ! —nhanagürü. Rü ngĩma ga Rúchi rü mea nüxũ iyangĩ ga yema ngĩrü deyuchiru, rü nüma ga Buá rü yema ngĩrü deyuchirugu ngixũ nanagü ga 40 quíru naguxũ ga chewáda. Rü

nhuxūchi ngixũ narüngũxêẽ ga ngítétigu nax naxúnagüpũũãxũ. Rú ngĩma rü yemamaxã ñanecax itáegu. <sup>16</sup>Rü yexguma ngĩxêxũtawana nanguxgu ga Rúchi, rü ngĩxê ngĩxna taca rü ngĩgürügü: —¿Nhuxãcü cuxũ nangupetũxũ, Pa Chauxacüx? —ngĩgürügü. Rú ngĩma ga Rúchi rü nüxũ iyaxu ga guxũma ga nhuxãcü ngixũ nax nangũxêẽxũ ga gumá Buá. <sup>17</sup>Rü nhuxūchi ngĩgürügü ta: —Rü choxna nanaxã i guxũma i nhaa chewáda, rü nhuxūchi choxũ nhanagürü: “Tama name i ngêacumexêãcüma cuxêcax cutáegu”, nhanagürü. <sup>18</sup>Rü yexguma ga ngĩma ga Noemí rü ngĩgürügü: —Nhuxma Pa Chauxacüx, rü name nixĩ i mea ícunanguxêẽ nax nhuxãcü tá nangupetũxũ i ngẽma cumaxã nüxũ yaxuxũ. Erü nüma ya Buá rü taxútama nanangexrü ega tama namexêẽãgu i ngẽma cumaxã nüxũ yaxuxũ. Rú nüma rü nhuxmatátama nixĩ i namexêẽãxũ —ngĩgürügü.

#### Buá rü Rúchimaxã naxãmax

**4** <sup>1</sup>Rü nüma ga Buá rü guma ñanearü ücuchicawa nayarüto yerü yéma nixĩ ga guxũma ga duũxũgü nachopetũxũ rü namexêẽãxũ ga norü guxchaxũgü. Rú yexguma yéma natoyane rü yéma naxüpetü ga guma natanücü ga Buá Rúchimaxã nüxũ yaxucü. Rú nüma ga Buá rü naxcax naca rü nhanagürü nüxũ: —¿Dücax, nua chauxütawana naxü rü írüto, rü paxaãchi tá tidexagü! —nhanagürü. Rú nüma ga yema natanücü rü yéma naxü, rü naxütawana nayarüto. <sup>2</sup>Rü nüma ga Buá rü

naxcax naca ga 10 ga ãëxgacügü ga guma ñanecüãx ixĩgũxũ, rü yemagü rü ta ñanatanogũxêẽ nax nümagü rü ta ñnütanũxũ yixĩgũxũcax. <sup>3</sup>Rü nüma ga Buá rü gumá natanücüxũ nhanagürü: —Ngẽma Noemí ga Moábianewa táegucü rü namaxã itaxechaũ i ngĩrü naane ga gumá tatanücü ga Erimeréarü ixĩxũ. <sup>4</sup>Rü cumaxã nüxũ chixu nax nüxũ cucuãxũcax i ngẽmachiga. Rú ngẽxguma cuxũ nangúchaũgu nax naxcax cutaxexũ rü name nixĩ i nhuxmatama naxcax cutaxe napexewa i nhaa ãëxgacügü i ñnütanũxũruxũ ixĩgũxũ. Erü cuma nixĩ i chorü yexera natanücü quixixũ ya Erimeré, rü ngẽmacax cuxna naxü nax naxcax cutaxexũ i ngẽma naane. Notürü ngẽxguma cuma tama naxcax cutaxegu, rü ¡chamaxã nüxũ ixu! Erü chama nixĩ i cuweama chaxixũ nax choxna naxixũ i ngẽma naane —nhanagürü. Rú yexguma nüma ga gumá natanücü rü nanangãxũ rü nhanagürü: —Ngẽmáacüx, naxcax chataxe tá —nhanagürü. <sup>5</sup>Rü yexguma ga Buá rü nhanagürü: —Rü ngẽxguma Noemíxütawana naxcax cutaxegu i ngẽma naane rü cuxna naxü ta nax Rúchimaxã cuxãmaxũ, nax ngẽmaãcü naxãxacüxũcax, rü yimã ngĩne rü tauxeta i ngĩtechicüxü nüxna naxixũcax i ngẽma naane —nhanagürü. <sup>6</sup>Rü yemaxũ naxĩnügü ga guma natanücü rü nanangãxũ rü nhanagürü: —Ega ngẽmaãcü yixĩgu, rü taxuacüma naxcax chataxe, erü chi ngẽxguma naxcax chataxegu rü ngẽma choxna üxũ i naane rü chi ta ngĩnena naxüe. Rú aixcuma cumaxã nüxũ chixu rü ¡cuma naxcax nataxe! —nhanagürü. <sup>7</sup>Rü woetama nüxcüma nixĩ ga Iraéutanüxũgü rü

yexguma taxacü ga nüxna üxü natanüxüna naxāxgu, rü ínacuañichi ga wüxicutü ga norü chapatu rü yema to ga natanüxüna nanaxā. Rü yemawa nixí ga duñüxügüxü nüxü nacuañēxü ga aixcuma nügiina nax naxāgüāxü. <sup>8</sup>Rü yemaçax ga gumá Buátanücü rü ínacuañichi ga wüxicutü ga norü chapatu rü Buána nanaxā rü nhanagürü nüxü: —¡Cuma naxçax nataxe i ngēma naane! —nhanagürü. <sup>9</sup>Rü yexguma nüma ga Buá rü nhanagürü nüxü ga yema ãëxgacügü ga ññetanüxüxü ixíxüxü, rü yema togü ga yéma írúdaunüxü: —Guxāma i pemagü i nhuxmax nua rúdaunüxe, rü pema nixí i nüxü pexñüexü nax chama ngíxü naxçax chataxexü i Noemí i ngēma naane ga Erimeréarü, rü Querióñarü, rü Maróñarü ixíxü. <sup>10</sup>Rü ngëxgumarüxü ta nüxü pexñüe nax ngíxü chayaxuxü i ngēma yutecü i Moábianecüñax i Rúchi nax ngēmaācü naxāxacüñçax rü yimá ngíne rü guma tauxeta ngíte ga Maróñchicüxü nüxna naxüñçax i ngēma naane —nhanagürü. <sup>11</sup>Rü nüma ga yema ãëxgacügü rü guñüma ga yema duñüxügü ga yéma írúdaunüxü rü nanangāxüga rü nhanagürügü: —Aixcuma toma nixí i nua itarúdaunüxü rü itarüññüexü. Rü nüma ya Tupana i nhuxmax cuxna imucü i nhaa nge, rü tanaxwaxe i ngíxü narüñgüxēē nax naxāxacüñçax ngíxñüxü ga Raquéu rü Leí ga ngíwa ne ixícü i guxāma i yixema i Iraéutanüxügü. Rü cumax, Pa Buáç rü Tupana cuxü rüñgüxēxē nax wüxi ya yatü ya duñüxügüpexewa mecü quixíxü i nua Beréñwa i Efrátawa! <sup>12</sup>Rü Cori ya Tupana cuxna namugü i muxü i cunegü

ngíwa i nhaa nge, rü yamu i cutanüxügü yexgumarüxü ga nax yamuxü ga nanegü ga guma Pére ga Yudá nane ixícü ga Tamáwañcü! —nhanagürügü. <sup>13</sup>Rü yemaacü nixí ga Buá rü Rúchimaxā naxāmaxü. Rü Tupana rü ngíxna nanamu ga wüxi ga ngíne. <sup>14</sup>Rü yexguma ga yema ngëxügü ga guma ññanecüñax rü Noemíxü ngíñgürügü: —Namecümāxüchi nixí ya Tupana erü marü cuxü nanangexmaxēxē ya daa cutaxa. Rü chierü natáçigagu i Iraéuanecüñaxgütanüwa. <sup>15</sup>Rü nüma tá nixí i cuxü nataāxēxēxü rü cuxna nadauxü i ngëxguma cuyaxgu, erü ngēma cuneax i cuxü ngechaññüchicü ngíne nixí. Rü ngíma rü cuxü ime i norü yexera ya 7 ya cunegü ega chi ngëxgumaepüx cuxü ngëxmaxgu —ngíñgürügü. <sup>16</sup>Rü ngíma ga Noemí rü tixü iyaxu rü tixü iyaxēxē ga guxema ngítaxa. <sup>17</sup>Rü yemaxü nadaugügu ga yema togü ga ngëxügü ga ngíñgüñgüñgü: —Wüxi ya ngítaxa ngíxü nabu i Noemí —ngíñgürügü. Rü Obéyigu inaxüégagü. Rü gumá Obéyi nixí ga Yeché nanatü rü ãëxgacü ga Dawíarü oxí ixícü.

#### Ññgacü ga Dawíarü oxíñgüçiga

<sup>18-22</sup>Nhaa oxíñgü nixí ga Buáarü oxíñgü ixíñgüxü: Rü Pére rü Eróñ nanatü tixí, rü Eróñ rü Ráñ nanatü tixí. Rü Ráñ rü Aminadábi nanatü tixí, rü Aminadábi rü Naachóñ nanatü tixí. Rü Naachóñ rü Chamóñ nanatü tixí, rü Chamóñ rü Buá nanatü tixí. Rü Buá rü Obéyi nanatü tixí, rü guma Obéyi rü Yeché nanatü tixí, rü nüma ga Yeché rü Dawí nanatü tixí.